

Hues ta hay'e culpable

Homber cu tabata abusa di muchanan ora di huiswerk condena na 5 año di prison



ORANJESTAD (AAN): Manera DIARIO a publica, Diabierna mainta Hues di Corte den Promer Instancia a dicta sentencia den e caso penal contra e homber T. Aunke cu T. ta para riba cu e no a abusa di e muchanan, Fiscal ta hay'e culpable y a exigí 6 año di prison. Hues tambe ta haya T. culpable y a conden'e na 5 año di prison.

SENTENCIA:

Via video conference e sentencia a tuma lugar, caminda un Hues di Corte di Husticia na Curacao a lesa e sentencia pa T., kende tabata den un cuarto na KIA, mientras cu den un sala di Corte na Aruba, abogado mr. Mohamed, prensa, Fiscal y Griffier tabata mira riba pantaya.

Hues a splica cu e motibo cu e ta dicta sentencia y no e Hues cu a trata e caso, ta pasobra cu e Hues cu a trata e caso, tabata su ultimo caso y a regresa Hulanda. Tabata bunita pa mira un Arubiano Hues estableci na Curacao a lesa e sentencia.

TA CULPABLE:

Hues a bisa cu Corte ta haya legalmente proba cu T. a abusa di e dos muchanan menor di edad cu ta famia di su pareha. Durante 2 año, T. tabata

abusa di e muchanan bou di e pretext cu e ta yuda nan cu huiswerk.

Hues a bisa cu a usa e declaracionnan di T. mes, di diferente testimonian y e victimanan mes. Hues a reacciona riba e ponencia di abogado cu mester declara T. liber, pasobra e declaracion di e menornan no ta confiabel. E abogado ta haya cu e muchanan no tabata consistente den nan declaracion y a crea duda.

Hues a bisa cu for di e investigacion mester conclui cu no tabatin penetracion sexual sino cu dede. Hues ta haya cu e declaracion di e muchanan enberdad riba cierto puntonan tabata dudoso pero e diferencianan no ta asina grandi. E detayenan si ta cuadra. Ademá Hues a bisa cu e ta haya cu tin prueba di sosten. Na opinion di Hues, e muchanan a declara e manera y unda e abusanan a sosode.

Nan declaracion ta wordo sosteni di e otro mucha, cu ta ruman di un di e victimanan y tambe ta haya ayudo di huiswerk serca T., cu a declara cu e porta di e camber unda cu T. tabata cu e muchanan ta sera na lock. Tambe el a bisa cu ora a habri e porta el a haya e dos muchanan den panty riba cama.

Hues a mostra cu esaki ta loke T. mes a declara cu e muchanan tabata den carson di abao y tabata sera e porta na lock.

ABUSA ORA DI HUISWERK:

Hues ta haya cu aki ta trata di abuso di dos menor di edad den e mesun camber bao di e pretext di ta yuda cu huiswerk. Esaki ta wordo sosteni pa declaracion di testimonian. Hues a bisa cu for di investigacion no a sali na cla cu T. tin problema di pedofilia of un preferencia di tene relacion. E ta haya T. culpable di a comete e

delito di tabatin relacion sexual cu muchanan bao 12 año y a haci esaki mas biaha. Ta trata di hechonan grave cu a sosode durante hopi tempo den cas di wela di e muchanan.

HUES A TUMA ACUSADO NA MALO:

Hues a tuma T. na malo cu a abusa di e muchanan mental. E muchanan mester a sinti nan mes sigur na cas di wela. Loke ta haci e caso mas grave ta e hecho cu e muchanan ta famia di T. mes. Hues ta haya cu T. a abusa di e confianza cu e muchanan tin den T. El a bisa cu hechonan asina ta

afecta e muchanan den nan desaroyo pa bira adulto.

CASTIGO:

Hues a bisa cu den caso normal di abuso di un mucha, Corte ta castiga cu 4 año di prison. Den e caso aki ta dos mucha y Fiscal a exigí 6 año. Hues a bisa cu e ta tene cuenta cu raport di psicologo y psiquiatra cu ta haya T. responsabel. Hues a honra e demanda di daño di e mayornan cu ta 5 mil florin pa cada un.

Hues a condena T. na 5 año di prison, kitando e tempo cu e ta sera den KIA.

Partido MEP ta recorda cu ta AVP ta esun cu a entrega autonomia di Aruba



ORANJESTAD (AAN): Parlamentari- onan di AVP un cos cu nan por bon ta lubida loke nan a causa e pais aki. Partido MEP a tuma nota un biaha mas di manipulacionnan di berdad cu ta biba den cada integrante di e partido berde.

No ta pornada nan a sinta den klas den e Scol di Corupcion di AVP. Den e caso aki, nos por menciona Parlamentario Mervin Ras Wyatt kende tin cara pa bisa cu Gabinete Wever-Croes a entrega autonomia financiero di nos pais.

Ta tempo pa e integrantenan riba e lista berda haya les di sinceridad of un cura pa nan amnesia. AVP mester realisa cu ta nan mes, na año 2014, a entrega e autonomia financiero di nos pais y awo no tin nada mas pa entrega.

Por corda cu na juli 2014, Mike Eman a acepta CAft pa investiga e presupuesto.

A acepta tambe adelanta cu e lo sigui tur e condicionnan y recomendacionnan di CAft mientras cu e tempo ey ni sikiera tabata tin un ley pa haci esaki. Asina mes, Mike Eman a doblega y a entrega nos autonomia financiero.

Na 2015, Mike Eman a bin cu e ley di LAft na unda cu e ta pasa e autoridad financiero di Parlamento pa CAft. Completamente, Fraccion di AVP a sostene e ley aki, apesar cu pueblo a protesta, apesar cu sindicatonan a vocifera cu nan no ta di acuerdo, Fraccion berde, incluyendo Mervin Wyatt Ras, no a scucha ni pueblo ni sindicato, y a sostene e ley y e ley a pasa toch.

Ta bon pa AVP realisa y acepta cu t'a nan a entrega e autoridad financiero di nos pais y no a resta nada mas pa worde entrega aworaki.